

Inatsisartut Suleriaasianni § 33, nr. 1 naapertorlugu Inatsisartut sinnerlugit Nunat Avannarliit Killiit Siunnersuisoqatigiiffianni aallartitanut siulittaasoq aalajangiiffigisassatut siunnersuummik imaattumik saqqummiussivoq:

Inatsisartut Nunat Avannarliit Killiit Siunnersuisoqatigiiffiata inassuteqaataanut nr 2/2012-imut isumaqataanissaat pillugu Inatsisartut aalajangiiffigisassaattut siunnersuut, inassuteqaat ima oqaasertaqarpoq:

Nunat Avannarliit Killiit Siunnersuisoqatigiiffiata Savalimmiuni Naalakkersuisunut, Kalaallit Nunaanni Naalakkersuisunut aamma Islandimi Naalakkersuisunut inassutigaa issittumi pissutsinut tunngasuni nunat suleqatigiinnerisa nukittorsarneqarnissaannut suliniummik aallartitseqqullugit kiisalu susasaqarfinni nunat ataatsimoorlutik soqutigisaqarfianni iliuusissamullu taamaattumut isumaqatigiiffigisinnaasaanni Issittoq pillugu nunat avannarliit killiit ataatsimoorlutik periusissaannik suliniuteqaqqullugit. Siunnersuisoqatigiiffiup aamma naalakkersuisut qinnuigissavai nunat taakku nunanut allanut ministerii akuttunngitsumik ataatsimiittassasut issittumi pissutsit pillugit oqallittarnissaq kiisalu ukiumoortumik imaluunniit ukioq allortarlugu nunani avannarlerni killerni soqutigisat soqutigisat allat pillugit oqallittarnissaq anguniarlugu. Ataatsimiittarnissaq sapinngisamik ukiumoortumik Nunat Avannarliit Killiit Siunnersuisoqatigiiffiata ataatsimiinnerani pisassasooq qinnutigineqarpoq.

(Aallartitat siulittaasuut/Delegationsformand Lars-Emil Johansen)

Akissuteqaat

(Naalakkersuisut Siulittaasuut)

Siullermeerneqarnera

Inatsisartut Nunat Avannarliit Killiit Siunnersuisoqatigiiffiata inassuteqaataanut nr 2/2012-imut isumaqataanissaannut siunnersuummut Naalakkersuisut qujassuteqarput.

Naalakkersuisut Nunat Avannarliit Killiit Siunnersuisoqatigiiffiat issittumi pissutsinut tunngasuni nunat suleqatigiinnissaannut periarfissat pillugit Issittummi Siunnersuisoqatigiinni aamma Issittoq pillugu Naalagaaffeqatigiit Periusissaannut tunngassuteqartuni oqaloqatigiittarnermut tapertatut oqalliffissaqqissutut isigaat, minnerunngitsumik Nunani Avannarlerni Ministerit Siunnersuisoqatigiivisa ataanni issittumi pissutsinut tunngatillugu suleqatigiittarnermut atatillugu. Taamaammat Naalakkersuisut Siulittaasuata nunani avannarlerni statsministerit maajip 16-iani Stockholmimi ataatsimiinnerat atorpaa ilaatigut Issittoq pillugu nunani avannarlerni killerni suleqatiminik oqaloqateqarnermut. Naalakkersuisut Siulittaasuata oqallittarfinni allani ataatsimiinnernut atatillugu issittumi ataatsimut soqutigisat oqallisigisarnissaat anguniartuarniarpaa.

Nunat avannarliit killiit/issittup oqallisigineqarnissaannik soqutiginninneq Naalakkersuisut sammisamut attuumassuteqarluartutut isumaqarfigaat. Ilutigalugu issittoq pillugu apeqqutinik oqallittarfinni nunani avannarlerni killerni naalakkersuisut akornanni qanimut oqaloqatigiittoqareerpoq. Savalimmiunut Kalaallillu Nunaannut tunngatillugu issittumi

periusissiaq Naalagaaffimmut tamarmut tunngatillugu ukiut marlussuit matuma siorna suliarineqartoq aallaavigalugu oqaloqatigiittoqarpoq.

Issittumi Siunnersuisoqatigiit taakkulu suleqatigiissitaat tamarmiusut tassunga atatillugu qitiulluinnarput, aammali Nunani Avannarlerni Siunnersuisoqatigiinnut tamanna issittoq pillugu apeqqutinik oqalliffigissallugu pingaaruteqarpoq. Nunani Avannarlerni Ministerit Siunnersuisoqatigiivisa missingersuutiminni politikikkut suliaassanut issittumilu suliniutissanut 9 mio. kr.-t aningaasaliissutigisimavaat. Tassunga atatillugu aamma nunatsinni ministerit siunnersuisoqatigiivisa Savalimmiormiut peqatigalugit issittumi politikikkut suliniutissat pingaarnersiorneqarnissaat pillugit Island nunallu avannarliit allat toqqaannartumik oqaloqatigisarpaat. Nunani Avannarlerni Ministerit Siunnersuisoqatigiivi kingullermik apriliip qaammataani Issittumi isumalluutinik atuineq pillugu isumasioqatigiipput, tassa nunani avannarlerni inatsisartut soqutiginninnerannut toqqaannartumik malitsigisaanik. Piffissarli isumasioqatigiiffiusoq ajoraluartumik naalackersuisut nutaat aallartinneranni pivoq, taamaalillutik Naalackersuisut peqataanissamut periarfissaqarsimanngillat.

Kalaallit Nunaat oqalliffinni ataatsimeersuarnernilu arlalinni issittumi silaannaq, pinngortitaq, avatangiisit politikikkullu suliaassarfiit allat pillugit ingerlaavartumik oqalliffigisartagaannut peqataasarpoq. Tamakku pillugit aamma Nunat Avannarliit Killiit Siunnersuisoqatigiivi oqaloqatigerusuttorujussuuagut.

Naalackersuisut Nunat Avannarliit Killiit soorunami tikilluaqqaat issittumi ataatsimut soqutigisat pillugit oqaloqatiginissaannut kiisalu Issittoq pillugu nunat avannarliit ataatsimut periusissiornissaannik eqqarsaateqarneq suliaqarnissarlu pillugit oqaloqatiginissaannut, tassa suliaassarfinnut nunat ataatsimut soqutigisaannut taamatullu periusissiornissamut isumaqatigiissuteqarfigisinnaasanut tunngatillugu.